

Malaysia terus lonjakan perdagangan, pelaburan

Negara di landasan tepat pacu ekonomi ke tahap lebih baik

Oleh Alzahrin Alias
zahrin@bh.com.my

Malaysia berada di landasan tepat untuk merealisasikan usaha negara menarik lebih banyak pelaburan dan perdagangan, seterusnya melonjakkan ekonomi negara ke tahap lebih baik.

Menteri Pelaburan, Perdagangan dan Industri, Tengku Datuk Seri Zafrul Tengku Abdul Aziz, berkata ia adalah berdasarkan data positif lonjakan perdagangan negara pada separuh pertama 2024 dan jumlah pelaburan diluluskan setakat suku pertama.

Pada separuh pertama 2024, perdagangan meningkat 8.4 peratus kepada RM1.396 trilion berbanding tempoh sama tahun lalu.

Pelaburan diluluskan pula berada pada RM83.7 bilion dalam tempoh tiga bulan pertama 2024, naik 13 peratus berbanding RM74.1 bilion yang dicatatkan sepanjang tempoh sama tahun lalu.

Beliau berkata, Kementerian Pelaburan, Perdagangan dan Industri (MITI) melalui Lembaga Pembangunan Pelaburan Malaysia (MIDA) menyasarkan peningkatan lima peratus dalam pelaburan diluluskan pada tahun ini melebihi RM329.5 bilion pada

tahun lalu.

"Kita sebenarnya sudah melepasi sasaran pelaburan ini pada suku pertama. Jika perlu kita akan semak semula perkara ini dan terus memantaunya kerana ia bergantung kepada tiga sektor ekonomi, termasuk pembuatan.

"Sasaran pertumbuhan itu juga selari dengan pertumbuhan Keluaran Dalam Negara Kasar (KDNK)," katanya pada sesi soal jawab selepas taklimat kad laporan suku kedua MITI di Kuala Lumpur, semalam.

Penguatkuasaan ringgit

Ketika ditanya adakah penguatkuasaan ringgit akan memberi kesan kepada prestasi perdagangan dan pelaburan negara, Tengku Zafrul berkata, ringgit bukan satu-satunya tonggak utama dalam penilaian pelabur.

Beliau berkata, banyak tonggak utama lain yang kekal mempunyai daya tarikan dan menarik minat pelabur global.

Pelabur katanya, akan mempertimbangkan prospek jangka panjang dan sesuatu yang menjadi sandaran dalam membuat keputusan mereka.

Jika melabur dalam pasaran modal katanya, turun naik ringgit akan memberikan kesan yang pantas.

Namun, dalam pelaburan langsung asing (FDI), penentuan prestasi ringgit adalah agak berbeza. Bila pelabur asing buat keputusan melabur katanya, ia akan mengambil masa sekitar dua tahun lebih untuk melihat kesannya.

"Sekiranya jatuh melebihi 10 peratus, sudah tentu ia akan menjadi kebimbangan kerana kebanyakan pelabur kerana ada kos dalam ringgit dan ada kos dalam dolar Amerika Syarikat (AS).

"Ia juga bergantung kepada sektor yang terbabit juga. Namun, semua ini akan diimbangi oleh eksport.

"Kerana eksport adalah dalam dolar AS. Secara dasarnya ia tidaklah membimbangkan.

"Itulah sebabnya kita dapat melihat bahawa lebih perdagangan kita membantu kerana kita mengeksport lebih banyak daripada kita mengimport. FDI adalah untuk pelaburan jangka panjang," katanya.

"Kita sebenarnya sudah melepasi sasaran pelaburan ini pada suku pertama. Jika perlu kita akan semak semula perkara ini dan terus memantaunya kerana ia bergantung kepada tiga sektor ekonomi, termasuk pembuatan"


Tengku Zafrul Tengku Abdul Aziz,
Menteri Pelaburan, Perdagangan dan Industri



Prestasi Perdagangan Malaysia Januari-Jun 2024*

PERDAGANGAN	EKSPORT	IMPORT	LEBIHAN DAGANGAN
RM1.396 trilion ↑ 8.4%	RM731.11 bilion ↑ 3.9%	RM664.99 bilion ↑ 13.8%	RM66.12 bilion ↓ 44.5%

Perdagangan bagi tempoh pertama tahun 2024 catat nilai tertinggi



*% Perubahan pada Januari-Jun 2024 berbanding Januari-Jun 2023

** Syer daripada jumlah eksport/import

Nota: Jumlah tidak semestinya terhasil disebabkan pembundaran

Sumber: DOSM